

四庫全書

集部

欽定四庫全書

集部
東澗集卷二

詳校官庶吉士_臣瑚圖禮

主事_臣呂雲棟覆勘

謄錄貢生_臣王毅

欽定四庫全書

集部四

提要

東澗集十四卷

別集類三 宋

臣等謹案東澗集十四卷宋許應龍撰應龍字恭甫閩縣人嘉定元年進士第調汀州教授累遷國子司業祭酒權直舍人學士二院官至端明殿學士簽書樞密院事提舉洞霄宮事蹟具宋史本傳其集則不見于藝文志

原書卷目已不可考明錢溥編次秘閣書目已不載其名則明初已散佚矣惟永樂大典頗散見其詩文抄撮排綴各體尚為粗備而制誥一類尤為繁富蓋應龍在理宗時歷掌內外制嘗以日昃拜命夜半宣鎖不二鼓而草三麻人服其敏史稱鄭清之喬行簡罷相制皆應龍所草帝極稱其善今二制並在集中典雅嚴重實能得代言之體其他亦多深

厚簡切而于當時宰執將帥侍從諸臣姓名
官爵遷轉拜罷紀傳所未詳者尤可藉以徵
信于考史尤為有裨又應龍于經濟幹畧深
所究心其知潮州屬劇盜逼境隨機扞禦諸
寇悉平治潮政績與李宗勉治台齊名及為
兵部尚書值喬行簡行秤提楮幣之法民間
不便應龍奏罷之今其劄子亦具存集內大
抵疏通暢達切中事情務為有用之言非篆

刻為文者可比雖其格力稍弱然卷容和雅
中尚不失先正典刑在南宋館閣之中亦可
稱一作手矣謹以類裒次彙為十有四卷著
之于錄俾不致泯沒于後焉乾隆四十六年
九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

東澗集卷一

宋

許應龍 撰

詔

科舉詔

改元以順天道將圖至治之勲得賢而立邦基茲實急
先之務矧是歲適逢於大比而羣才方喜於彙征爰舉
彝章肆頒渙號書其德行道藝將以賓興取之族黨比
閭式昭公選冀因名而得實盡崇雅以黜浮俾偕計吏

而來以待所庭之問藹藹吉士必多忠言鯁論之流巍巍成功庶及嘉祐淳熙之盛故茲詔示想宜知悉

嘉平朔日蝕星聚避朝損膳廣宥多辟降詔

時懋厥德斯全裁成輔相之宜謫見于天當謹寅畏嚴恭之念朕自慙涼菲適值艱虞外焉疆場之未寧內則政事之多闕日蝕星聚既垂儆戒之機夕慮朝思期盡感通之實避殿減膳正事飭躬謂有過在于一人尚賴交修之益而推恩足保四海盍頒肆赦之書庶幾和氣

之致祥自格乾文之順軌與爾有衆永孚于休其令有
司檢會故實條具以聞

賜簽書樞密院事兼權參知政事李鳴復生日
詔

榮司樞筦參預政機茲當來復之初適屆誕彌之節宜
頒異數以介壽祺

賜參知政事李鳴復生日詔

月屆仲冬實陽氣潛萌之始天生賢佐乃太平能立之

卷一
基既昭弧矢之祥宜厚牽醪之禮往祇恩遇益介壽祺

賜端明殿學士朝請大夫同簽書樞密院事李

宗勉生日詔

金風送爽玉露團清允謂佳辰實生賢佐爰錫牽醪之
禮庸昭弧矢之祥往服榮恩益綏壽祉

賜特進左丞相兼樞密使肅國公喬行簡生日

詔

季秋改朔灝氣澄空茲宇宙之佳辰生廟堂之賢佐肆

頒慶賚式侑燕私往祇恩數之隆益介壽祺之永

賜太傅奉國軍節度使克萬壽觀使新安郡王

揚谷生日詔

望重懿親位尊公傅茲屆誕彌之旦茂膺滋至之休爰
錫多儀以昭隆眷

賜參知政事鄭性之生日詔

新陽來復愛日迎長實惟良辰是生賢佐宜頒寵數以
示眷私

皇叔保康軍承宣使希遷辭免特授保康軍節
度使提舉萬壽觀依前皇叔進封會稽郡開國
公加食邑食實封恩命不允詔

立愛惟親當由近始以德詔爵庶穆師言矧卿以叔父
之尊藹宗英之譽待人接物盎然如愛日之溫省事清
心澹乎若深淵之靚久任承流之職可無進律之褒遂
渙號于明廷俾建旌于舊鎮仍開公社庸侈徽章示隆
禮以尊賢初非私予胡辭榮而避寵母乃過謙其體至

懷亟祗成命

皇弟保康軍承宣使貴謙辭免特授保康軍節
度使仍奉朝請依前皇弟進封天水郡開國公
加食邑食實封恩命不允詔

朕繼志述事每思祖武之繩立愛惟親當篤天倫之眷
矧吾介弟夙迪令猷方隆友睦之情可後褒崇之典擢
從留務晉陟齋壇爰陞公爵之封并行圭畚之食由序
而進非朕爾私顧出令以惟行豈循牆之可避亟祗成

渙母勞固辭所辭宜不允

皇弟武康軍承宣使提舉佑神觀與芮辭免特
授武康軍節度使提舉萬壽觀進封天水郡開
國子加食邑食實封恩命不允詔

朕立愛始于家實聖經之明訓于弟欲其貴乃大義之
當然矧有鼻章難稽成渙是用分洋川而作鎮肇建節
旄即天水以進封併加井邑增棣華之鞞鞞延瓜瓞之
綿綿既允穆于師言宜亟欽于明命所辭宜不允

少師保寧軍節度使判大宗正事嗣秀王師彌
乞解職畀祠不允詔

卿屬近行尊量宏識遠久任訓齊之寄備著公勤陶成
信厚之風悉遵禮法善於其職簡在朕心胡存抗于囊
封乃力求于祠廩徒得君重以為公族之表儀僉曰汝
諧奚必謙詞而退避祇若予命毋煩重陳

特進鄭清之三辭免觀文殿大學士醴泉觀使
兼侍讀恩命不允不得更有陳請詔

懇辭政柄既曲徇于雅懷留侍經帷蓋勉從于朕志已嘗諄諭何至洊陳眷言舊學之臣久勤台德之輔倏然舍去云胡不思况非勞以職事之煩第欲廣予見聞之益不遠伊邇初無跋履之難蓋歸乎來庸副眷懷之切所辭宜不允

宣奉大夫鄒應龍再辭免除資政殿學士知慶元府沿海制置使恩命不允不得再有陳請詔徒得君重暫司制閫之權勉為朕行庸壯海邦之勢胡

封囊之游奏謂陳力以不能毋乃過謙非予所望况晉
升秘殿蓋將昭體貌之隆苟曲徇雅懷何以重股肱之
寄其祇承命毋復重陳所辭宜不允

宣奉大夫新除禮部尚書鄒應龍辭免兼修玉
牒官恩命不允詔

編年以紀帝系而載其歷數及朝廷政令之因革者為
玉牒以宰臣提綱而命從臣以修之蓋重其事也擢居
是職必擇鴻儒以卿魁倫碩望直諒多聞晉長儀曹已

著寅清之譽進讀經幄復殫啟沃之忠俾兼職于纂修
胡抗章而遜避毋稽朕命往服厥官所辭宜不允

宣奉大夫新除禮部尚書鄒應龍辭免兼侍讀
恩命不允詔

朕若稽古訓圖濟治功乃擇儒紳之英俾陪經幄之邃
以卿學問淵粹議論正平懷尊主庇民之心有博古通
今之識可輔成于台德宜進讀于邇英蓋體至懷亟殫
素蘊胡執謙沖之意尚陳遜避之章所辭宜不允

宣奉大夫守禮部尚書兼修玉牒官兼侍讀鄒
應龍辭免除端明殿學士簽書樞密院事兼權
參知政事恩命不允詔

卿自掇魁倫徧更清要出藩入從四十餘年每懷靜退
之心未展經綸之蘊屬更大化圖任舊人進讀經筵每
及三邊之備禦究心兵畧見于十事之開陳宜陟樞庭
仍參大政當以平時之議論亟圖今日之事功胡固執
于謙沖迺力形于遜避其祇承命以副眷懷所辭宜不

允

端明殿學士中奉大夫新除簽書樞密院事兼
權參知政事鄒應龍辭免同提舉編修經武要
略恩命不允詔

聖祖神宗克振炎圖之業明謨睿斷具存要略之書非
賴編摩曷昭軌則然任提綱之寄實資執政之臣卿有
學有文能定能應既處樞機之地宜參總領之司必撮
其要舉其宏纂成鉅典庶顯哉謨承哉烈啟佑後人往

究乃心毋戮朕命所辭宜不允

端明殿學士宣奉大夫簽書樞密院事兼權參
知政事鄒應龍乞解機政不允詔

方事之殷正資長策奉身以退難徇雅懷已曲示於勉
留胡復申於前請精加葆蓄自底康強勿云陳力以不
能當以體國而為念其安厥位用副予懷所請宜不允

太中大夫知樞密院事兼參知政事鄭性之端
明殿學士宣奉大夫簽書樞密院事兼權參知

政事鄒應龍端明殿學士朝請大夫同簽書樞
密院事李宗勉以鬱攸挺災乞退歸田里不允

詔

祝融為沴蓋過在于朕躬近輔抗章謂咎繇于臣等力
求解職將以弭災然移疾于股肱曷召和于形氣側身
修行朕方懷兢業之思同寅協恭爾盍盡贊襄之力惟
交修其不逮庶有感以必通茲所當為豈宜引去所請
宜不允

朝請大夫寶謨閣待制提舉隆興府玉隆萬壽宮吳潛辭免除戶部侍郎淮東總領兼知鎮江府恩命不允詔

翔而後集固欲全進退之宜用之則行毋固執謙沖之意載惟京口允謂要衝至若軍儲尤為急務疇咨已試無以踰卿盍疾其驅往服厥職胡上封囊之奏尚懷投杼之疑推善政以得民不加賦而足用使餉饋不絕而閭里相安皆卿所優為者亟圖績效以寬顧憂所辭宜

不允

中奉大夫權吏部尚書兼同修國史實錄院同
修撰兼給事中兼侍講趙彥懋辭免陞兼侍讀
恩命不允詔

朕學于古訓日就月將期底緝熙光明之功尤賴老成
典刑之助卿詩書儒雅禮樂宗英講殿談經約文申義
厥旨敷暢朕甚嘉之宜進讀于邇英益輔成于台德其
體至意毋庸固辭所辭宜不允

朝散大夫權吏部侍郎兼直學士院兼玉牒所
檢討官吳泳辭免除權刑部尚書兼職依舊恩
命不允詔

朕改元更化任賢使能矧惟常伯之尊盍選真儒而用
卿忠勤一節直諫多聞自聯侍從之班屢罄論思之益
敷為帝制雅健雄深晉貳銓曹清通平允肆陟刑曹之
長庸昭眷意之隆以次而遷何辭之有亟祇成命益茂
遠猷所辭宜不允

朝散大夫權刑部尚書兼直學士院兼玉牒所
檢討官吳泳辭免陞兼修玉牒官其餘兼職依
舊恩命不允詔

纂修瑤編屬之詞臣蓋舊典也卿學該百氏才擅三長
帝籍討論已逾再禩蓋陞一級以示寵褒茲乃次遷何
勞遜避能于前而不能於後豈有是哉毋棄爾成益勵
厥職所辭宜不允

朝散大夫吳泳辭免除寶章閣學士知寧國府

恩命不允詔

卿徧歷要塗十更歲籥敷文華而緯典司喉舌以納言
久著休稱將膺顯用倏然去國畀以典藩仍陞學士之
班庸示邇臣之寵蓋欽予命言貽爾車胡為執於謙沖
乃欲求於遜避其體至意毋煩重陳所辭宜不允

寶章閣直學士中大夫知靜江軍府事兼本路
經略安撫使鍾震乞許奉祠不允詔

維屏維藩既膺隆委成終成始蓋罄壯猷胡奏封章乃

求真館徒得君重已能綏幽遠之民方圖子功宜仰體
眷知之意毋勞遜避嗣有恩榮所請宜不允

顯謨閣學士宣奉大夫提舉建康府崇禧觀陳
咳辭免依舊顯謨閣學士除沿海制置使知慶
元府恩命不允詔

卿曩鎮荆襄久更歲月邊烽不聳闔境底寧肆酬爾庸
擢升常伯自處祠庭之佚屢興宣室之思載惟制垣實
控海道孰任維藩之寄當資已試之能爰錫明綸曷陳

巽牘徒得君重庶宣牧御之勞勉為朕行用副眷知之
篤令無反汗卿勿固辭所辭宜不允

朝奉郎權刑部侍郎兼侍講李大同辭免除吏
部侍郎兼職依舊恩命不允詔

朕惟左銓最為劇任員多闕少法弊例繁苟非其人曷
振厥職卿昨居言路激濁揚清晉貳刑曹惟明克允疇
咨典選無以踰卿其體眷知毋勞遜避所辭宜不允

朝請郎試吏部侍郎兼侍講李大同辭免除權

工部尚書恩命不允詔

貳卿而遷常伯乃彛典也矧由刑曹而至小宰將及二稔公于執法允穆師言晉陟冬卿庸示褒寵胡為抗䟽尚慮曠官銓曹最號劇煩既能勝任起部第司營繕蓋所優為其即欽承毋勞遜避

中奉大夫權兵部侍郎兼同修國史實錄院同修撰兼侍講范鍾辭免除兵部侍郎兼職依舊恩命不允詔

亞旅司戎既能稱職所庭渙號就使為真雖恩渥之方
新而事權之惟舊蓋亟承于成命胡尚抗于封囊卿不
激不隨有猷有守久輔緝熙之學每殫啟沃之忠眷懷
固切于予衷遷進姑循于彛典初非超躡奚用遜辭

中奉大夫試兵部侍郎兼同修國史實錄院修
撰兼侍講范鍾辭免除吏部侍郎兼職依舊恩
命不允詔

典選郎闡夙炳至公之鑒陞華小宰蓋資已試之材渙

號甫頌師言允穆胡力陳于奏牘謂莫任于劇曹况武部為真已高資望今左銓進掌初匪超踰其加甄別之精益振清通之譽令行弗反卿毋固辭

寶文閣學士中大夫新知福州余天錫辭免除吏部尚書兼給事中兼侍讀恩命不允詔

式是南邦方資申伯興思宣室復召賈生昭予念舊之懷畀以維新之命昔已登于八座今宜長于六卿兼司瑣闥之權入侍邇英之讀允為異渥蓋即欽承胡尚執

于謙冲乃力求于遜避引以自近尤賴告猷令出惟行
詎容反汗亟服厥職以副予知所辭宜不允

太中大夫試吏部尚書兼給事中兼侍讀余天
錫辭免除端明殿學士同簽書樞密院事恩命
不允詔

朕理內御外將期疆場之安決勝運籌尤賴樞機之密
欲共成于偉績當圖任于舊人卿溫乎其和定而能應
輦轂夙資于彈壓朝夕尤罄于論思再陟文昌藹著清

通之譽兼司瑣闥益高直諒之風進讀通英輔成台德
各稱其職肆簡眷以彌隆暨予同心善彌縫而藏用宜
居右府密贊廟謨允穆師言蓋即承于休命曷呈免牘
猶未體于至懷令出惟行卿毋固避所辭宜不允

端明殿學士通議大夫簽書樞密院事余天錫
乞俾還里閑不允詔

風雨示變天以警予避殿求言側身修行尚賴交修其
不逮庶幾有感以必通胡為抗章遽欲西去是圖是究

當助成燮理之功無伏無愆斯可致和平之福其體至
意毋勞重陳所請宜不允

端明殿學士通議大夫簽書樞密院事余天錫
再乞俾遂山林之志不允不得再有陳請詔

比覽囊封已諭朕意胡為再瀆復述前言卿既參密勿
之司盍替燮調之職予欲汝翼何虞賢路之妨爾尚交
修庶格天心之享當徇大義毋執謙詞

資政殿大學士銀青光祿大夫新除沿海制置使

暫兼知慶元府趙善湘再辭免依舊除四川宣撫使兼知成都府恩命不允不得再有陳請詔西土不靜重懼侵軼之虞下民其咨正切綏懷之望必真儒之復用庶外患之潛銷卿比總制垣誓平逆賊率彼淮浦合水陸以交攻殲厥渠魁致氛埃之頓息懋乃攸績簡在朕心屬茲元帥之謀無若舊人之任肆予命汝謂宜叱馭而驅曷弗云來乃上掛冠之請矧太宗之維翰盍與國以同憂克壯其猷當亟圖于康濟能勝其

任母固執于謙冲所辭宜不允

中奉大夫權禮部侍郎兼侍讀趙汝談辭免權
刑部尚書兼職依舊恩命不允詔

卿聞多學廣心醇氣和老成典刑藉甚宗英之譽文章
爾雅敷為國典之華儀曹茂著于寅清經席每殫于啟
沃雖謙以自牧荐避寵以辭榮然朕所深嘉宜尊賢而
隆禮肆頒渙號晉陟文昌僉曰汝諧令行弗反亟服厥
職毋煩固辭所辭宜不允

金史卷一百一十一
卷一
端明殿學士朝奉大夫簽書樞密院事兼權參
知政事李鳴復乞退歸不允詔

朕惟二三執政猶吾股肱一體相資斯成至治卿頃由
言路晉陟文昌曾未幾時徑司樞筦正賴同心而協力
庶幾彊本以折衝知無不為盍憂邊而思職謙以自牧
迺推賢而遜能雖卿欲全進退之宜而朕當篤始終之
眷其體至意毋勞重陳所請宜不允

端明殿學士朝奉大夫簽書樞密院事兼權參知

政事李鳴復再乞歸田里不允不得再有陳請詔見幾而作雖欲為決去之謀事君以忠益仰體挽留之意矧邊烽之屢警而闕政之尚多賢和于朝苟并謀而合智外禦其侮庶保大以定功所當懷報國之思胡屢上封囊之奏勉圖經濟庸副倚毗所請宜不允

端明殿學士朝奉大夫李鳴復辭免除資政殿學士知紹興府恩命不允詔

善謀善斷正賴倚毗何嫌何疑力求退避屢遣中使以

示挽留之意復頒詔旨以昭眷遇之隆雖曲盡于真忱
竟莫回于雅志晉陞祕殿俾鎮帥藩勉為朕行冀使京
師之蒙潤不遠伊邇庶寬宣室之興思何未體于至懷
尚復形于遜牘其祇成命母至重陳所辭宜不允

資政殿學士朝奉大夫知紹興府浙東安撫使
李鳴復辭免召赴行在恩命不允詔

十國為連暫領藩宣之寄五月報政已聞聲譽之休潤雖及于
京師思屢興于宣室人惟求舊遂頒詔以趣還令出惟行蓋

脂車而入覲曷陳巽牘殊拂至懷時事方殷正賴贊襄之力
同心共濟庶成康乂之功式遣其歸以稱朕意所辭宜不允
資政殿學士知紹興府浙東安撫使李鳴復再
辭免召赴行在恩命不允不得再有陳請詔

一節以趨盍仰體眷懷之篤再命而偃乃復陳遜避之章雖
欲全靜退之風然莫副倚毗之意不遠伊邇特一葺之可航
盍歸乎來慰羣情之傾俟令無反汗卿勿固辭所辭宜不允
資政殿學士朝奉大夫知紹興軍府事充兩浙東

路安撫使李鳴復辭免除參知政事恩命不允詔
式適其歸已屢頒于召節漢汗其號俾參預于政機固宜
不俟駕而行胡尚抗封囊之奏謂惟堪于藩屏殊未體于
眷知卿獨立無朋至剛以直每切憂國愛君之念存陳理
內御外之規實允契于予懷肆復膺于大用善謀善斷既
夙著于休稱同德同心當共圖于至治庶盡卿致主之
術而成朕知人之明毋庸固辭亟祗成命所辭宜不允
資政殿學士朝奉大夫知紹興軍府事充兩浙東

路安撫使李鳴復再辭免除參知政事恩命不允詔
翔而後集雖獨高靜退之風惠然肯來盍仰體眷懷之
切比洵頌于名節茲擢預于政機不進不休令固無于
反汗則久則速禮尤貴于從宜矧一葦之可航何抗辭
而至再期于治當亟殫翊贊之忠式造其歸毋堅執
謙冲之意所辭宜不允

資政殿學士朝奉大夫李鳴復赴行在再辭免
參知政事恩命不允詔

側席待賢屢勤趣召振衣造闕式副具瞻宜亟理于政
機胡尚陳于遜牘謙以自牧雖獨高靜退之風予欲汝
為可不體簡知之意矧比登于宥府嘗協贊于廟謨允
武允文既足任樞機之寄立政立事豈難圖康濟之勲
往服厥官毋戮朕命所辭宜不允

中奉大夫參知政事李鳴復辭除樞密院事兼
參知政事恩命不允詔

卿自參知大政益勵精忠同德同心善彌縫而藏用允

文允武尤公直以無私俾晉總于樞庭與共圖為廟算
仍兼丞弼協贊鈞衡予欲汝為所合亟祇于成命謙以
自牧曷求改畀于時髦茲特次遷毋庸力避其思康濟
式副眷懷

中大夫參知政事李鳴復辭免同提舉編修勅
令恩命不允詔

金科玉條置局以刪修之而實總于執政蓋舊典也况
卿才全德鉅學廣聞多無所不通既董修于武畧著而

為令豈難舉于宏綱毋執謙辭亟祇成命所辭宜不允
中大夫知樞密院事兼參知政事李鳴復乞退
歸不允詔

敬天之怒豈以弗慮而弗圖正事以承尤賴汝為而汝
翼茲值烈風之警端由已德之愆朕若歸過于股肱殆
匪責躬之實卿若力辭于機政曷殫體國之忠其務贊
襄以圖銷弭

中大夫知樞密院事兼參知政事李鳴復再乞

投閒不允不得再有陳請詔

卿職兼二府忠實無私輔贊彌縫共圖康乂風雨之變
天以儆朕夙夜祇懼與卿同之雖力行罪已之文恐未
盡弭災之道至誠可感尤賴交修胡再上于需章乃欲
求于閑退義難曲徇卿勿重陳所請宜不允

中大夫知樞密院事兼參知政事李鳴復再乞
去不允詔

宥密基命實資樞筦之籌精神折衝漸息邊庭之警勉

出乃力亟圖爾庸曷懷避寵之思荐上丐閑之請奉身而退雖欲全名節之高與人同憂所當任安危之寄其體至意毋勞重陳

太中大夫參知政事兼同知樞密院事鄭性之
辭免除知樞密院事兼參知政事恩命不允詔
朕立號改元勵精更始既得人以共政蓋隆禮以尊賢
卿直諒一心周旋兩地外不動于聲色中默運于籌謀
同寅協恭憂邊思職予嘉乃德宜晉陟于元樞惟爾之

能仍復參于大政綸音甫播輿論交孚宜體眷懷益殫
經濟胡執謙冲之意迺陳遜避之章亟祗厥官毋替朕
命所辭宜不允

太中大夫參知政事兼同知樞密院事鄭性之
再乞放歸田里不允不得再有陳請詔

朕以實應天側身修行尚虛揆席以待耆英翊贊萬幾
惟資執政同心體國方副予懷胡為抗章幡然求去挽
留甚力宜即欽承何嫌何疑至陳再牘況今邊陲未靖

民瘼未蘇欲庶事之康哉豈一變之足矣其思夾輔毋庸固辭所請宜不允

太中大夫知樞密院事兼參知政事鄭性之再乞俾歸田里不允不得再有陳請詔

朕兢業萬幾簡求四輔冀同心而體國庶強本以折衝卿名重魁倫材高經濟諫垣抗疏首排喜功好大之謀右府運籌莫非和衆安民之計朕所深倚人無間言胡再騰遜避之章猶未體眷留之意期予于治盍殫輔翼

之忠無棄爾成庶底教寧之績勉徇大義母庸固辭所
請宜不允

太中大夫鄭性之除職與郡辭免不允詔

卿迭更兩地已閱四朞每思職以憂邊務同心而輔政
胡為避寵乃力丐閑勉徇雅懷畀以藩宣之寄仍升華
職昭予簡眷之隆母庸固辭亟祇成命所辭宜不允

太中大夫鄭性之辭免除資政殿大學士知紹
興府浙東安撫使恩命不允詔

卿荐上囊封力辭樞筮念久任股肱之寄固宜加體貌
之隆爰錫明綸晉陞祕殿不遠伊邇莫若會稽以寵其
行俾分帥閭豈但京師之蒙潤庶寬宣室之興思宜疾
其驅往服厥職以副朕意毋庸固辭所辭宜不允

資政殿學士魏了翁再辭免依舊資政殿學士
知福州福建安撫使恩命不允不得再有陳請
詔

我圖爾居信莫如于南土徒得君重諒無薄于淮陽謂

即欽承豈宜引避已嘗諄諭奚復重陳矧惟三山易治
之邦第煩卧護當戒十乘啟行之日毋以疾辭往服厥
官以稱朕意所辭宜不允

資政殿學士魏了翁再辭免依舊資政殿學士
知紹興府浙東安撫使恩命不允不得再有陳
請詔

式遄其歸屢興思于宣室引以自近俾分治于東郊庶
幾善政之得民抑使京師之蒙福蓋欽成命言脂爾車

胡尚執于謙冲至游求于退避徒得君重以為屏翰之
光勉為朕行亟任保釐之寄庸副與望毋煩固辭所辭
宜不允

欽定四庫全書

東澗集卷二

宋 許應龍 撰

詔

宣奉大夫李稟辭免除同知樞密院事四川宣撫使恩命不允不得再有陳請詔

盡護諸將當屬重臣克壯其猷無如元老況士卒樂為之用而草木亦知其名成命初頒師言允穆先聲所至已處置以得宜威令既孚豈安強之難致能勝其任盍

圖爾庸母固執于謙冲庶亟寬于憂顧所辭宜不允

宣奉大夫新除同知樞密院事四川宣撫使李

梈求早遂退休不允詔

載覽封章備知偉績招攜以禮已安反側之心整師修
戎復振驅攘之畧渠魁就戮聲勢寢張尤堅一意于防
秋足見盡忠于體國自任以重既能勝委寄之隆圖惟
厥終庶立底輯寧之效胡為遜避猶至再三身實佩于
安危所關者大心苟懷于進退是棄爾成益殫元老之

壯猷罔使前人之專美所請宜不允

宣奉大夫同知樞密院事四川宣撫使李璣乞

免奏事不允詔

閱勞以事遂頒詔以趣還式迨其行冀有謀而入告曷
騰奏牘遽欲掛冠鄉老成而有典刑靖共而好正直宣
威全蜀備歷艱勤召對昕庭庸昭簡注雖道之云遠不
無跋履之勞然民具爾瞻已俟來歸之亟其體至意毋
庸固辭

宣奉大夫同知樞密院事四川宣撫使李真辭
免仍知成都府恩命不允詔

四路之權既能勝任一州之寄夫豈難兼况諸制垣悉
總郡事胡獨陳遜避之牘謂莫當酬應之繁然各有司
存奚待躬親于細務徒得君重第煩振舉于大綱矧元
老克壯其猷而羣材樂為之用必能共理毋庸固辭所
辭宜不允

同知樞密院事四川宣撫使李真乞退歸田里

不允詔

自任以重既處置之得宜毋棄爾成庶安強之可致胡
為謙遜又欲退休方特建于宣威弗復分于制閫事權
歸一脉絡相通况有請以必行顧奚施而不可是崇是
信方篤于眷懷何嫌何疑尚虞于讒謗其體至意永肩
一心豈惟叔善勝之功抑亦有無窮之聞所請宜不允
寶章閣學士通奉大夫淮南東路安撫制置使
兼知揚州趙葵辭免權將淮西一路分隸史嵩

卷二
之與趙葵節制恩命不允詔

文武兼資無施不可東西惟命何為力辭况與人而同
憂每以重而自任深溝固壘已處置以得宜決勝運籌
致寇攘之潛弭復遣精騎力援鄰封予嘉乃勳俾分兼
于制閩維揚我武當力奏于膚功其亟欽承毋庸遜避
以解倒垂之急克成無敵之功時乃之休惟朕以懌所
辭宜不允

資政殿大學士通議大夫提舉臨安府洞霄宮

葛洪初辭免依舊資政殿大學士提舉萬壽觀
兼侍讀日下前來供職恩命不允不得再有陳

請詔

朕更新庶政圖任舊人遠既召于耆英近可忘于元老
肆頒明命趣侍經筵謂詢黃髮則罔所愆而學古訓乃
能有獲蓋資爾典刑之重非勞以職事之煩盍即欽承
胡為遜避况其室則邇初無跋履之難不俟駕以行庶
副眷懷之切其祇新渥勿復重陳所辭宜不允

資政殿大學士通議大夫提舉臨安府洞霄宮
葛洪再辭免依舊資政殿大學士提舉臨安府
萬壽觀兼侍讀日下前來供職恩命不允不得
再有陳請詔

卿老成而有典刑正直而無偏黨昨參大政確守精忠
久佚祠庭興思宣室欲輔成于台德俾進讀于經帷盍
歸乎來奚再陳于遜牘不遠伊爾宜亟駕于安車庶于
朝聽夕訪之間益廣日就月將之學其體至意毋庸固

辭所辭宜不允

寶謨閣學士朝議大夫沿江制置使兼知建康府陳韡辭免特轉兩官除煥章閣學士依舊沿江制置使兼知建康府行宮留守兼淮西制置使恩命不允詔

卿允武允文善謀善斷首平七閩盜賊之擾闔境堵安繼專三道節制之司羣凶影滅暨金陵之分閩殲京口之逆儔比因強寇之鴟張復厲精兵而血戰士卒樂為

之用真足追良將之風草木皆知其名宜兼任淮西之
寄肆升華職仍陟崇階總兩路之權所制者廣決千里
之勝何功不成宜即欽承以寬憂顧胡遽陳于巽牘殊
未體于至懷所辭宜不允

賜寶謨閣學士朝議大夫沿江制置使江南東
路安撫使馬步軍都總管知建康府事兼行宮
留守新除兼淮路制置使陳韓辭免兼淮西制
置使恩命不允詔

守邊備塞正資處置以得宜應變隨機尤貴事權之歸
一遂令制閫兼總帥垣庶脉絡之貫通無彼此之扞格
胡過形于謙遜謂莫任于驅馳况八面之才無施不可
而十連之寄夫豈難勝體予眷倚之隆亟底拊綏之績
令無反汗卿勿固辭所辭宜不允

端明殿學士太中大夫崔與之辭免除觀文殿
大學士提舉臨安府洞霄宮恩命不允詔

卿識並著龜心堅金石年彌高而德彌劭事可法而義

金史卷之二
卷二
可尊久從綠野之遊實繫蒼生之望渙汗其號晉登弼
亮之司盍歸乎來克盡經綸之業胡未承于休命乃屢
奏于需章避寵辭榮莫致安車之至尊賢隆禮可無寵
渥之頒書殿升華祠庭均佚庸示朕心之眷以昭全節
之高令出惟行卿毋多遜

端明殿學士太中大夫崔與之再辭免觀文殿
大學士提舉臨安府洞霄宮恩命不允詔

亮采惠疇正有賴老成之重辭榮避寵乃欲全名節之

高雖屢趣于鋒車竟莫回于雅志渙汗其號晉升書殿
之班惟適所安俾處祠庭之佚胡為謙遜猶復控陳茲
特彝章未足示尊賢之禮其祇成命尚無忘告后之猷
資政殿學士太中大夫提舉臨安府洞霄宮崔
與之再辭免特授正議大夫右丞相兼樞密使
恩命不允不得再有陳請令疾速赴都堂治事

詔

天下大老咸徯來歸若時登庸中外胥慶已令帥臣以

禮勸勉復遣中使諭旨趣行宜乘安車亟造廊廟以副
眷懷之切以圖康濟之功奏牘存陳乃堅遜避雖道之
云遠不無跋履之勞然民具爾瞻實佩安危之寄徒得
君重勉為朕行毋徇小廉以孤衆望所辭宜不允

觀文殿大學士金紫光祿大夫醴泉觀使兼侍
讀喬行簡辭免特進左丞相兼樞密使進封肅
國公加食邑一千戶食實封四百戶恩命不允

詔

立政惟人明王所以寧萬國辭榮避寵君子所以善一身權之以義孰為重輕卿之事朕十有三載知無不言無不驗彌縫藏用善則稱君暨予同心爰立作相方喜獲老成之助與共圖康乂之功屬咎證之未消援故事而丐去趣遣四輩留侍經帷雖詢黃髮罔所愆固賴著龜之益然涉巨川求攸濟詎容維楫之無爰啟沃于朕心俾晉陞于上宰明綸甫播輿論交驩謂衮衣歸周公豈止京師之奠而中國相司馬自無邊隙之生母徇

謙冲之私宜從中外之望所辭宜不允

觀文殿大學士光祿大夫醴泉觀使兼侍讀喬
行簡辭加食邑食實封恩命不允詔

朕躬親珪幣宗祀明堂仰獲顧歆迄成熙事率循彝典
敷錫湛恩邦甸侯衛輝胞翟閭罔不沾被矧吾碩輔顯
相盛儀盍先渙號之頒申行土田之錫義所當受毋復
重陳所辭宜不允

特進左丞相兼樞密使肅國公喬行簡辭免提

舉國史實錄院提舉編修國朝會要恩命不允

詔

朕緬惟中興以來更歷四朝承烈顯謨具載簡冊閱時
滋久猶未成書遂命史官專任修纂然總提其綱必資
碩輔所以重其事也卿間世真儒斯民先覺翊贊機務
整理有條擘畫謨猷何事弗濟顧豈不能據三尺以總
太史之任乎其趣汗青毋煩遜避

特進左丞相兼樞密使肅國公喬行簡辭免提

舉編修玉牒監修國史日厯提舉編修經武要
略提舉編修勅令恩命不允詔

纂修鉅典各有司存而宰相無所不統實提其綱蓋舊
典也矧卿道包衆有材擅三長謀畧精深憲章明習總
領庶職潤色成書以新一代之典直餘事耳其祇朕命
毋煩固辭所辭宜不允

特進左丞相兼樞密使喬行簡再乞俾歸田里
不允詔

卿四載秉鈞一心體國好賢樂善休焉其如有容事君
盡忠粹然一出于正復能定而能應每必躬而必親屬
當多事之時正賴耆英之助曷荐陳于奏牘乃求解于
政機况筋力未衰尤克任弼諧之重而安危所寄豈宜
懷進退之思毋棄爾成期于予治所請宜不允

特進左丞相兼樞密使肅國公喬行簡以烈風
乞解政機不允詔

驟雨終日方深積潦之虞昊天動威復示烈風之警減

膳徹樂罪已求言正有賴于贊襄庶潛消于變異胡騰
奏牘祈解政機倘移疾于股肱曷召和于形氣側身修
行朕當懷兢業之思惟時亮工卿盍盡燮調之道其體
至意毋復重陳

特進左丞相兼樞密使肅國公喬行簡再乞投
閑不允不得再有陳請詔

卿自登揆路四閱歲華勤勞百為總領衆職彌縫臧用
朕所仰成積雨烈風脩垂儆戒正賴交修其不逮庶幾

轉妖而為祥比騰巧去之章已諭眷留之意胡為再瀆
殊拂至懷雖欲全進退之宜其孰任變調之寄當徇大
義毋庸重陳所請宜不允

特進左丞相兼樞密使肅國公喬行簡第三劄
乞解政歸耕不允不得再有陳請詔

克壯其猷無如元老自任以重有若保衡再登弼亮之
司益勵公忠之節不隨不激言皆可行必躬必親事至
能應朕所深倚衆無異詞胡因變異之臨屢上退閑之

請方今邊陲未靖民瘼未蘇矧值藹攸正資銷弭若方
勤於撲斲而遽易于工師人將謂何勢必不可其安厥
位共圖寧救之功毋棄爾成盍體眷留之意所請宜不
允

朝議大夫權禮部侍郎兼同修國史實錄院同
修撰兼侍講游似辭免除權禮部尚書兼職依
舊恩命不允詔

卿有文有學可企前修不倚不流允為吉士再登班列

益勵公忠談經則有剴切之功典禮則著寅清之譽子
嘉乃德俾晉長于儀曹往服厥官蓋欽承于休命矧惟
序進何以辭為尚體深知以宏遠業所辭宜不允

朝議大夫權禮部尚書兼同修國史實錄院同
修撰兼侍講游似辭免陞兼侍讀恩命不允詔
卿聞多學廣色溫氣和勸講雍容善于敷暢以輔台德
啟沃良深進讀須賢肆以命汝庸示褒崇之寵曷騰遜
避之章蓋體至懷亟祇成渙所辭宜不允

朝議大夫權禮部尚書兼同修國史實錄院同
修撰兼侍讀游似丐祠不允詔

西陲繹駭正資經理事難籌度爰集謀猷卿蜀士之英
公忠明審每于經筵進讀之頃獲聞邊事緩急之詳因
思患以預防可隨機而應變胡為抗疏遽丐叢祠當與
人而同憂有謀必告庶運籌而決勝圖功攸終其體眷
懷益殫忠蓋所辭宜不允

朝議大夫權禮部尚書兼同修國史實錄院同

修撰兼侍讀游似乞賜投閒不允詔

卿望重羣英職兼兩部密輔緝熙光明之學每殫論思
獻納之勤啟沃良多忠嘉可尚胡辭榮而避寵冀置散
以投閒雖卿欲全高尚之風而朕當篤始終之眷其體
至意毋勞重陳所請宜不允

朝議大夫權禮部尚書兼同修國史實錄院同
修撰兼侍讀游似辭免除禮部尚書兼職依舊
恩命不允詔

直哉惟清既能典禮肆予命汝就使為真雖恩渥之維
新而事權之仍舊曷陳免牘未體至懷卿學識兼該端
方有守每因誦讀之頃屢殫啟沃之忠簡在朕心當畀
便蕃之寵茲因彛典尚何遜避之為所辭宜不允

朝議大夫試禮部尚書兼同修撰兼侍讀游似
辭免兼給事中恩命不允詔

瑣闥之司政綱所繫必得端方之彥庶伸封駁之權卿
純粹無瑕靖共有守典禮著寅清之譽進讀多劇切之

功允謂蓋臣宜兼茲職謙以自牧乃陳遜避之章知無
不為盡體選掄之意其祇成命毋庸固辭所辭宜不允
朝議大夫新除禮部尚書兼同修國史實錄院
同修撰兼侍讀游似辭免陞兼修國史兼實錄
院修撰恩命不允詔

纂修史籍由同而正蓋彛典也卿學該百氏才擅三長
論撰逾年善于其職晉陞一級以示寵褒胡執謙冲謂
難冒處能于前而不能于後豈有是哉毋棄爾成亟祇

朕命所辭宜不允

中奉大夫試禮部尚書兼給事中兼修國史實
錄院修撰兼侍讀游似辭除吏部尚書兼職依
舊恩命不允詔

卿比兼銓曹藹著休績執法若權衡之審知人如冰鑑
之明屬常伯之尚虛選真材而後授疇咨已試僉曰汝
諧遂輟自于容臺俾晉躋于舊職欽予時命尚何遜避
之為往服厥官益振清通之譽

中奉大夫吏部尚書兼給事中兼修國史實錄
院修撰兼侍讀游似乞退從醫藥不允詔

卿銓部持衡藹著清通之譽夕郎振職咸推封駁之功
况進讀于過英尤輔成于台德朕所深眷入靡間言胡
避寵以辭榮乃引疾而求去恪恭乃事既無曠于厥官
優游爾休尚何虞于餘證當體簡知之意毋懷進退之
心益懋遠猷以副輿望

朝散大夫權戶部侍郎兼同詳定勅令官兼知

臨安府浙西安撫使趙與權辭免除戶部侍郎
兼權兵部尚書兼職依舊恩命不允詔

輦轂彈壓素號繁財賦源流尤難稽考卿恢恢游刃
藉藉休聲既左右之俱宜豈褒揚之可後爰正貳卿之
位復陞常伯之班庸重藩宣式昭簡眷蓋即承于休命
胡尚執于謙詞往修厥官益宏遠業所辭宜不允

朝奉大夫試戶部侍郎兼權兵部尚書兼同詳
定勅令官兼知臨安府浙西安撫使趙與權辭

免除權戶部尚書兼職依舊恩命不允詔

載惟民部實掌邦財浩如海暴如山最難鈎考建其長
立其貳俱合選掄卿自副地官每殫心計革吏胥之欺
弊知貢賦之源流下不病民上無乏用善于其職予所
深嘉擢從小司徒之班畀以大常伯之任宜亟承于休
命胡尚執于謙詞亟服厥官以永終譽所辭宜不允

降授朝奉大夫權戶部尚書兼同詳定勅令官
兼知臨安府趙與權辭免特與叙復元官恩命

不允詔

鬱攸為沴既殫撲滅之勞稠疊抗章乃有過愆之懼力
求貶秩將以示公勉徇卿之所陳實非予之獲已况散
財發粟深慰于輿情接棟連甍悉還于舊觀公私無擾
兵民相安清議莫不交稱青氊固宜亟復胡辭榮而避
寵欲後已以先人益見謙冲良深嘉歎其祇承命毋復
重陳所辭宜不允

朝散大夫試戶部尚書趙與權辭免兼修玉牒

恩命不允詔

編年以紀帝系而載其歷數及朝廷政令之因革者為
玉牒以宰臣提綱而命從臣以修之蓋重其事也擢居
是職必擇英材以卿信厚性資被服儒術自登宗寺為
簿為丞而復為卿其于瑤編紀之詳而攷之熟矣茲俾
兼領以續前功蓋體至懷毋庸遜避所辭宜不允

朝請大夫試戶部尚書兼修玉牒官趙與權乞
畀祠祿不允詔

惟爾之能信多多而益辦使治其賦宜綽綽而有餘正
賴剝裁以供調度胡陳巽牘遽丐叢祠卿比尹神臯克
勤民事既公清而不撓尤經理以得宜休績藹聞朕心
以憚乃執謙冲之意屢辭彈壓之勞勉徇雅懷俾專司
于民部庶幾省事得一意于邦財方嘉整飭以有倫難
避寵榮而求去益圖來效庸副深知所辭宜不允

朝散大夫趙與權辭免除戶部尚書日下供職

恩命不允詔

司民部之權已能稱職渙昕庭之號就使為真以穆師
言式昭隆眷盍亟承于新命胡尚執于謙詞卿自尹神
臯藹騰休譽隨機應變處置得宜戢吏愛民寬嚴相濟
况直鬱攸之後尤多經理之功既力丐于退閑難久勞
以煩劇勉從雅意俾專任于版曹茲特舊官非躡陞于
峻級其安厥位以副朕心所辭宜不允

朝請大夫試工部侍郎兼權給事中兼侍講李
宗勉辭免陞兼侍讀恩命不允詔

朕惟臺諫言國家之得失糾命令之過差然進見之尚
疎猶開陳之未盡豈若談經于間日許其賜坐以移時
用廣多聞以輔台德卿有博古通今之學懷憂國愛君
之忠執法烏臺升華騎省並兼勸講多所發明茲擢長
于諫垣宜進讀于經席其摠素蘊以沃朕心何固執于
冲懷未即膺于成命所辭宜不允

朝請大夫試左諫議大夫兼侍讀李宗勉辭免
除端明殿學士同簽書樞密院事恩命不允詔

改元更化期臻綏定之功立政惟人莫重樞機之寄參
稽輿議咸曰汝諧况諫疏屢陳罔匪憂國愛君之意及
經筵進讀悉闡理內御外之規尤不激以不隨復能定
而能應允為正士宜弼朕躬盍仰體于隆知胡尚形于
遜牘令行弗反卿毋固辭所辭宜不允

端明殿學士朝請大夫新除同簽書樞密院事
李宗勉辭免同提舉編修經武要畧恩命不允

詔

卿允武允文善謀善斷度德定位既登宥密之司強本折衝正賴贊襄之力載惟要畧具在成書雖編摩已屬于有司而典領實資于近輔肆予命汝盍撮其要而舉其宏傳之無窮庶軌易遵而度易則亟祇成渙毋庸固辭所辭宜不允

端明殿學士朝請大夫同簽書樞密院事李宗勉辭免依舊端明殿學士除簽書樞密院事恩命不允詔

卿自司宥密益勵公忠同寅協恭善彌縫而藏用憂邊
思職尤處置以得宜予嘉乃勳渙汗其號特錫陞遷之
寵庸昭委寄之隆永肩一心當為強本折衝之計以康
四海庶成用儒無敵之功尚克欽承毋勞遜避所辭宜
不允

端明殿學士朝請大夫簽書樞密院事李宗勉
再乞奉祠不允詔

辭榮避寵雖欲全進退之宜思始圖終庶不負倚毗之

意比嘗諭旨奚復抗章勿貳勿疑方深于簡眷汝為汝翼蓋罄于忠勤矧素懷體國之心而屢進採時之策言底可績豈已試以罔功民具爾瞻尚無慙于非據當徇大義毋事小廉所請宜不允

中奉大夫參知政事李宗勉乞退歸不允詔

風烈必變將圖銷弭之方職思其憂正賴贊襄之力曷陳奏牘祈解政機靜言咎徵之形實警朕躬之失我其夙夜盍正事以建中移之股肱豈應天而以實當務同

心而輔政庶幾轉妖而為祥毋庸重陳其體至意所請
宜不允

中奉大夫參知政事李宗勉再乞退歸不允不
得再有陳請詔

二三執政猶吾股肱一體相須斯成至治茲當變異之
做實由政化之愆方賴交修庶幾潛弭已嘗諭旨胡復
抗章當與國以同憂務應天而以實其安厥位庸副予
懷所請宜不允

寶章閣學士太中大夫新除京西荆湖南北路
安撫制置使兼沿江制置副使兼知鄂州史嵩
之乞改畀叢祠不允詔

卿自領制垣荐更歲籥務防秋而備塞善應變以隨機
整吏修戎比決邊陲之戰排鋒挫銳將伸中國之威盍
展壯猷益圖偉績胡為遜避遽欲退休勿貳勿疑朕方
隆于委寄成終成始庶永底于安強毋庸固辭勉徇大
義所請宜不允

寶章閣學士太中大夫淮西制置使兼沿江制
置副使兼知鄂州史嵩之乞祠廩不允詔

安邊境立功名蓋用禮樂詩書之帥修封疆守要害自
無寇賊姦宄之虞既得若人宜久其職卿昨司襄閩備
悉敵情嘗屢奏于膚功信足當于隆委遂以兩道之寄
特勞十乘之行屬時繹騷究心籌畫遣師徒而捍禦弭
隣敵之憑陵然蹂踐之餘尚資經理而流離之衆尤賴
撫綏胡遽抗于囊封乃欲安于真館能勝其任豈宜懷

退避之思母棄而成庶亟底安強之績勉從朕志嗣有殊恩所請宜不允

參知政事督視軍馬史嵩之乞畀祠祿不允詔整師修戎既克底侵疆之復命將遣戍又能挫外敵之鋒允謂殊勲深副興望方身佩安危之寄實係重輕胡力辭督視之權欲求閑退雖備見謙冲之意然孰圖康濟之功矧已陟于台司宜益宏于遠畧其徇大義毋事

小廉

通奉大夫參知政事督視京西湖南北江西路
光蕪黃施夔州軍馬史嵩之乞畀祠祿不允詔
卿昨司制閫屢閱歲華應變隨機不但固邊陲之守排
鋒挫銳又能伸中國之威已綽著于殊勲遂宏開于督
府獨當隆委益展壯猷招輯淮軍欲安民而和衆遣行
蜀戍尤與人而同憂既處置之得宜信緩急之足恃成
終成始盍圖爾庸何嫌何疑遽騰遜牘况實佩安危之
寄豈宜懷進退之心其體眷知益思經濟


通奉大夫參知政事督視京西湖南北江西路
光蘄黃施夔州軍馬史嵩之辭免兼督視淮西
軍馬恩命不允詔

理內御外固當因時而施宜強本折衝尤貴併謀而合
智遂令督府兼總西淮庶脈絡之相通而事權之歸一
以守則固何功不成况恢恢游刃之材何兢兢履薄之
慮祇若子命毋事謙詞

通奉大夫參知政事督視京西湖南北江西路

光蘄黃施夔州軍馬史嵩之再辭免兼督視淮
西軍馬恩命不允詔

比覽囊封已諭朕意胡為再牘復述前言謂同舟方運
于風波而一室難分于爾汝則宜共濟矣庸固辭况已
遣于援師俾相為于犄角既合督府制垣之力當銷敵
國外患之虞其展壯猷亟圖偉績



欽定四庫全書

集部
東澗集卷三
四

詳校官庶吉士臣瑚圖禮

主事臣呂雲棟覆勘

欽定四庫全書

東澗集卷三

宋 許應龍 撰

批答

中大夫參知政事李宗勉上表再辭免特授通
奉大夫左丞相兼樞密使不允批答

立政立事既資參預之司善斷善謀密効彌縫之力疇
若予采無以踰御擢居家揆之尊仍總洪樞之寄明廷
孚號寰宇均懽謂公而無私必能開衆正而杜羣枉仁

而有勇豈難撫百姓而鎮四夷已允穆於師言蓋亟據於遠略謙以自牧竟荐陳遜避之章予欲汝為宜仰體眷知之意令行弗反卿毋固辭

端明殿學士通議大夫簽書樞密院事余天錫
上表再辭免除參知政事不允批答

善謀善斷既密運於洪樞允武允文宜晉參於大政以昭隆委式副具瞻胡未體於至懷乃荐形於巽牘予欲汝翼令出惟行當協恭而和衷共圖遠畧庶理內而御

外亟底丕平茲乃序遷毋庸多遜

中奉大夫游似上表再辭免端明殿學士簽書
樞密院事不允仍斷來章批荅

朕勵精思治立政惟人敬老尊賢既畀當軸處中之任
運籌決勝尚資隨機應變之才以卿持銓衡則僉謂清
通居瑣闥則屢嘗駁正至於進讀尤切納忠以若所為
可當大任肆予命汝俾贊洪樞胡守一謙至形再膺其
體眷知之意亟圖康濟之勲

余天錫上表再辭免除同簽書樞密院事恩命
不允仍斷來章批答

安邊境以立功方思長策任舊人而共政俾贊廟謨何
明命之載頒乃固辭而未已雖欲表謙冲之意然當明
緩急之宜顧今何時正圖共濟勉出乃力庶能有成毋
曲徇於小廉盍亟祇於新渥其殫忠蓋以副倚毗所辭
宜不允仍斷來章者

觀文殿大學士金紫光祿大夫醴泉觀使兼侍

讀喬行簡辭免特進左丞相兼樞密使進封肅
國公加食邑食實封恩命不允批荅

進退不失其正雖欲全名節之高輔弼以成厥功當盡
展經綸之蘊比莫回於雅志姑屈侍於經帷咸欣大老
之來歸傾僎真儒之復用亟揚渙號晉陟元台天日為
之開明中外聞而呼舞既上下之叶應豈勲業之難為
進英俊則可以彊本朝擇將帥則可以安邊境總庶職
則無苟且之弊開衆正則絕佞倖之私况善斷而善謀

復同心而同德從欲以治永孚于休毋固執於謙辭盡
勉徇於大義所辭宜不允

宰執赴經筵聽講三朝寶訓終篇奏謝宣答詞
聖緒紹休求多聞而建事皇祖有訓已勸誦以終篇實
自弼諧奚勞稱謝

侍讀官進讀終篇奏賀謝宣答詞

祖訓昭垂莫非懿範邇英進讀已遂終篇有喜啟沃之
勤猶賴發揮之廣

宰執率侍讀侍講說書侍立官奏賀訖宣答詞
誦祖訓以徹章端自贊襄之力率儒臣而稱慶足知懇
款之忱方思洪業之遵尚冀朕心之沃

文武百僚宰臣喬行簡等三上表奏請皇帝御
正殿復膳聽樂宜允批答

朕自御便朝脩更累月日不遑食期咸和於萬民予欲
納言奚暇聞於六律務側身而修行將以實而應天比
覽封章冀復曩典雖不惟不敢愈殫抑畏之思然至再

至三重涕虔奉之請勉循衆志深惕予懷尚資協恭而和衷勿憚格王而正事庶蒙孚佑亟底輯寧所請宜允
文武百僚宰臣喬行簡等詣文德殿三上表奏
請皇帝御正殿復膳宜允批答

省表具知寅畏嚴恭冀獲帝心之眷起居飲食敢從已
欲之私俟咎證之寢銷復常儀而未晚然抗章以請既
勤至再以至三而承天所為當不以文而以實苟務盡
忠而補過必能轉妖而為祥勉循所陳益思加謹所請

宜允

文武百僚宰臣喬行簡等三上表奏請皇帝上
壽宜允批答

理內御外方圖再安而再寧勞思焦心幾至不寢而不
食雖當誕節亦輟彛儀一札賜頒俾免効華封之祝三
章來上猶欲同嵩嶽之呼意則彌勤理難固拒然歸美
報上豈惟稱萬壽之觴而補過盡忠尤冀獻千秋之鑑

資政殿學士朝奉大夫前知紹興府李鳴復上

表再辭免新除參知政事恩命不允仍斷來章

批答

賁然來思已體眷知之意亦既見止獲聞經濟之言宜益罄於精忠以輔成於台德比因遜牘嘗諭至懷胡云就列以不能尚欲辭榮而避寵卿言雖力朕志弗移圖任舊人正欲贊萬幾之務欽予時命當共凝庶績之熙毋徇小廡以辜衆望所辭宜不允仍斷來章

文武百僚參知政事鄭性之等上表奏請皇帝

御正殿不允批答

省表具知翼翼小心方嚴歲祀燦燦震雷倏爾動威既垂警戒之機敢替寅恭之念側身修行下詔求賢圖所以銷弭而感格者不遑寧處避正殿減膳羞徹音樂益加貶損以示夙夜畏威之忱乃若指陳時弊啟沃朕心以輔其不逮者實惟公卿百執是賴庶形聲和而天地應以永孚于休便坐疇咨治固無壅若御正寧誠非所安所請宜不允

文武百僚宰臣喬行簡等奏請皇帝御正殿復
膳聽樂不允批答

遇災而懼盍圖銷弭之方思德以承當盡寅恭之實悉
從貶損冀補過愆尚虞民瘼之未蘓莫致天心之昭格
曷遽陳於奏牘欲亟復於舊章意則彌勤義難曲徇嗟
爾有衆方謀爰處以爰居其在朕躬詎可求安而求飽
未暇聽聲音之奏將期致枹鼓之和其體至懷毋庸固
請所請宜不允

再請御正殿復膳聽樂不允批答

比以鬱攸為疹怵惕與思謂經德秉哲以畏天斯盡感
通之實非避殿減膳而撤樂曷昭抑損之忱雖舉彝章
尚多闕政輔予不逮賴爾交修胡未喻於至懷猶存陳
於奏牘勞來安集俟舊觀之悉還飲食起居庶常儀之
可復卿言雖力朕意不移所請宜不允

文武百僚宰臣喬行簡等詣文德殿拜表奏請皇
帝御正殿復膳不允批答

省表具知以日星而為紀每虞帝度之差非夙夜以畏
威曷格皇穹之眷比太史預占於薄蝕而朕心益致於
嚴恭下詔而發德音避殿而減常膳冀圖銷弭用集休
祥雲涵而興脩廣垂於覆冒日中至昃竟莫見於盈虧
敢云有感以必通尤賴交修其不逮曷遽陳於奏牘祈
即復於彛章意則雖勤義難曲徇所請宜不允

文武百僚宰臣喬行簡等詣文德殿再拜表奏
請皇帝御正殿復膳不允批答

省表具知朕側身修行以實應天其在燕閒尚軫不睹
不聞之懼矧當變異敢懷求安求飽之心爰御便朝仍
減常膳胡甫踰於半浹荐冀復於舊章雖太陽交蝕之
時已因雲而弗見然上天難諶之意當靡日以不恭其
體至懷母勞固請所請宜不允

文武百僚宰臣喬行簡等再上表奏請皇帝上
壽不允批答

載震載風式臨誕日之期是究是圖方急安邊之務將

運籌而決勝猶暇食以不遑難徇彛章舉行慶禮頒十行之札已諭至懷上萬壽之觴曷形再牘雖備悉虔拳之意然恐非宴樂之時宜畧繁文共成偉績所請宜不允

文武百僚宰臣喬行簡等上表奏請皇帝御正殿復膳聽樂不允批答

風雨震凌既垂儆戒夙夜祇懼詎敢康寧將正事建中以承天當避殿減膳而撤樂冀消咎證以召至和雖轉陰為晴幸免浸淫之患然側身修行盍堅終始之誠曾

未越於數旬乃祈復於常典倘求安求飽遽欲聞六律
之音是弗慮弗圖何以格兩間之佑勉思修輔毋存控
陳

文武百僚宰臣喬行簡等再上表奏請皇帝御
正殿復膳聽樂不允批答

仁愛人君既示譴告扶持之意恪謹天戒敢求起居飲
食之安矧未致形氣之和又奚暇聲音之聽已嘗諭意
曷荐抗章苟徇卿之所陳是重吾之不德小心翼翼方

勤政事以飭躬百僚師師當務盡忠而補過惟交修其
不逮庶有感以必通俟休證之若時復常儀而未晚毋
勞固請其體至懷

左丞相喬行簡再上表辭免特授少傅平章軍
國重事進封益國公不允仍斷來章批答

朕參稽成憲褒寵者英晉陞亞傅之尊獨冠台司之任
予欲汝翼正資經濟之遠圖復閱其勞特命平章於重
事庶朕不失典刑之助而卿亦獲泮奭之休既揆義以

兩全曷抗章而三遜期予于治益殫元老之壯猷時乃之功罔俾前賢之專美

參知政事李宗勉再上表辭免特授通奉大夫左丞相兼樞密使不允仍斷來章批答

奮庸熙載實歸端揆之司為官擇人莫若真儒之用肆班渙號以副具瞻况邊事未寧正賴是圖而是究何需章來上猶勤至再以至三亟服厥官期予于治不特卿有無窮之聞抑使邦其永孚于休

端明殿學士朝請大夫同簽書樞密院事李宗
勉再辭免依舊端明殿學士簽書樞密院恩命
不允仍斷來章批答

宥密之司其任至重由同而正茲實曩章渙號甫頒師
言允穆比騰免牘母乃過謙已導至懷胡猶未喻况事
權之惟舊非等級之變殊勿庸固辭亟祇成命所辭宜
不允

皇叔新除保康軍節度使希遷辭免前官恩命

不允仍斷來章批答

卿屬近行尊所當優禮承流授鉞盖有舊章成命誕敷
僉言惟允荐陳吳牘足見謙冲雖慶賞固待有功然藩
屏莫如同姓初非濫授宜即欽承况令出惟行義無反
汗已嘗諭旨勿庸固辭

少傅保寧軍節度使判大宗正事嗣秀王師彌
再辭免特授少師加食邑食實封恩命不允批

答

朕立愛惟親以德詔爵矧卿以宗盟之長董屬藉之司
比及三年悉陶善教遂多彬彬文學之彥有如振振信
厚之時載念難兄嘗膺褒渥茲有成績盍舉舊章晉陟
亞師僉言惟允宜欽成命勿庸固辭所辭宜不允

少傅保寧軍節度使判大宗正事嗣秀王師彌
三辭免特授少師加食邑食實封恩命不允仍
斷來章批答

董正宗盟已更三禩率循舊典盍進一階遂揚渙號之

新俾陟亞師之位朕非私予人無間言胡為謙遜之深
乃至再三之瀆雖辭榮避寵固欲全風節之高然敬老
尊賢當仰體眷懷之篤亟祇成命毋復重陳所辭宜不
允仍斷來章者

金紫光祿大夫喬行簡辭免觀文殿大學士醴泉
觀使兼侍讀恩命不允批答

卿善謀善斷同德同心老成而有典刑惓惓憂國論諫
而本仁義炳炳如丹暨秉鈞衡愈宣忠力方喜獲贊襄

之益與共圖康濟之功曷因變異之臨屢上退休之請
莫回雅志姑佚祠庭冠書殿以通班侍邇英而進讀豈
惟納誨以輔德蓋將論道以經邦謂亟欽承乃堅避避盡
念十二年之久相得益彰胡為再三瀆之煩愬然求去
不獨卿有報國未遂之歎亦使朕獲用賢不終之譏其
體至懷以全大節

德音

兩淮荆襄四川州縣被寇寬卹德音

勅門下朕更化勵精視民如子固封守而康四海期臻
保定之功修文德以來遠人每切綏懷之念然內治之
尚缺致外患之未平荆襄既被於創殘淮蜀重遭於侵
擾道路流離之衆慘不聊生室廬焚燬之餘茫無所托
骨肉罹於荼毒丁壯困於轉輸常產僅存者莫供征斂
之須舊業乍還者又乏耕犁之具肆夙宵之軫慮如冰
炭之交懷嗟汝何辜由吾不德幸天人猶助於信順而
將帥悉力於捍防雖烽燧之甫停奈瘡痍之未復肆頒

渙號用慰羣情發粟以賑貧蠲租而布惠血戰之士當
議優恩死事之家蓋加卹典或乘時而嘯聚或失律以
逋逃咸與維新同歸於治於戲各得其所既推還定勞
來之恩適觀厥成永底安靜和平之福咨爾藩宣之吏
奉予寬大之書毋事虛文俾沾實惠

嘉平月朔日蝕星聚德音

勅門下朕纂紹丕基躬親庶政無日不惕每思是究以
是圖畏天之威安敢自暇而自逸適衆星之交聚而靈

曜之復虧端由朕德之愆莫副皇穹之眷遇災而懼可
無消弭之方承意以從當盡寵綏之念肆頒渙號誕告
多方薄斂寬租俾沾實惠赦過宥罪咸與惟新輯寧蹂
踐之區勞來流離之衆勝捷者厚加於恩賞亡歿者亟
錄其子孫使無愁嘆怨恨之聲用集安靜和平之福庶
蒙字佑永絕艱虞於颺風翔而和氣游盍廣德澤流行
之施人說而天意解佇開日星明潤之祥尚期藩屏之
臣各盡布宣之職勿為文具以副朕心主者施行

誥詞

權禮部尚書游似陞兼侍讀誥

入侍經帷俱資賢德然勸講則第分章而析句進讀則
可因事以納言以次而遷蓋優茲選具官某講明正理
博極羣書日就月將期廣緝熙之學朝聽夕訪每殫啓
沃之忠既升常伯之尊宜進邇英之讀雖循故事益峻
新班援古證今當盡責難之義引君當道庶成善治之
功往服厥官以副朕意

資政殿大學士葛洪特授提舉萬壽觀兼侍讀

誥

建道德以為師冀獲多聞之益命朝夕而納誨莫如良
弼之求趨造昕庭肆頒渙渥具官某學該百氏文倡諸
儒彊而義簡而廉澄不清撓不濁擢參機政屢進忠嘉
自勇退於急流久養恬於真館學于古訓當圖任於舊
人侍我經帷庶輔成於台德不遠伊邇盍歸乎來其體
眷懷益殫啟沃

翰林學士洪咨夔除端明殿學士提舉萬壽觀

魚侍讀誥

翰苑辭榮爰畀祠庭之佚邇英進讀仍升秘殿之華庸
示異恩肆頒成命具官某才周世用譽冠時髦激濁揚
清蹇蹇厲匪躬之節閑邪陳善拳拳懷憂國之忠掖垣
推潤色之工銓部著清通之譽甫升瑣闥復上玉堂不
進不休方圖柄任至三至再乃以疾辭蓋隆禮以尊賢
使清心而省事峻陟延恩之職時游廣廈之間既俾躬

而處休當勿藥而有喜精加葆嗇用副朕懷

起居郎曹叡除權禮部侍郎誥

知無不言允謂正直端方之士德以詔爵蓋居論思獻
納之班爰錫明綸庸昭隆眷具官某天資和粹德宇恢
洪出駕軺車每務揚清而激濁入登言路尤思補過以
盡忠勸講經筵輔成台德遂擢從於柱史俾晉貳於儀
曹往服厥官豈但惟寅於夙夜以報其上益殫入告之
謀猷茂對殊休以階顯用

宗正少卿兼權禮部侍郎游似除權禮部侍郎

誥

修禮明樂蓋有司存為官擇人當繇試可已著直清之
譽蓋申褒擢之恩具官某器局恢洪風規秀整和不流
而中不倚言有物而行有常勸講經帷輔成君德儀曹
兼攝尤夙夜以惟寅舊典聿新豈禮文之猶闕既能勝
任何以假為爰正位於貳卿俾升華於法從益修厥職
用副予知

資政殿學士知紹興府李鳴復除參知政事詰
理內御外將期庶政之交修選賢與能莫若舊人之圖
任肆頒渙號以穆師言具官某間世真儒斯民先覺介
然有守未嘗揚已以取名知無不言莫匪愛君而憂國
人無異議朕所深知允為直諫之臣遂畀樞機之任彌
縫藏用處置得宜遽收斂於經綸出鎮臨於屏翰報政
未久胡東欲留而西欲歸有德可尊故彼無惡而此無
數宜錫趣還之命擢陞參預之司爰進爵封并增圭食

噫竭股肱之力本忠正以輔一人庶道德之威成安疆
以清四海祇服朕命益展壯猷

宗正少卿魚檢正魚權戶部侍郎趙與權除戶

部侍郎誥

司民部之權既能稱職漁旰庭之號就使為真允謂殊
休式昭隆眷具官某稟資信厚律已公清登文學法理
之科有俊敏疏通之識出則任侯藩之寄入而膺宰掾
之司隨所設施藹然聲譽暨副地官之職尤知邦計之

源遂令綽綽以有餘足見多多而益辦宜正貳卿之秩
仍參省闈之華茂封寵榮益思獻納

林畧除宗正少卿誥

宗寺典司屬籍事簡職清實論思獻納之階也儻匪名
儒蓋不輕授以爾聞多學廣心正氣和詞章諧韶護之
聲聞望藹珪璋之粹繇此致身於通顯曷嘗枉道以求
人衆皆曰賢蓋復歸於清著德以定位宜進貳於司宗
益懋遠猷嗣膺異渥

趙以夫除直煥章閣樞密副都承旨誥

右府本兵之地事機貴密宣納之任要在得人以爾才
周世用望重宗英使節州麾所至可紀郎省卿寺無施
不宜况荐更宰掾之司尤善贊廟謨之運升華邃閣導
旨樞庭益究遠猶以需顯用

江萬里趙發除校書誥

校讎東觀漢以碩學名儒任其職唐則以為文士起家
之良選肆我國家益加崇重非儒科前列黌宇名流殆

不輕畀以爾萬里蜚英舍選直諒多聞以爾發得雋鼎
魁安恬有守俱假塗於學省遂給札於玉堂敷陳讜言
切中時病或畀校讎之職或居是正之官茂對寵榮益
加韜養

徐元杰除校書郎誥

魁倫之英榮進素定擢陞秘府猶以序遷蓋所以養其
望而碩其用也以爾文諧韶濩行粹珪璋姓名獨冠於
儒科器識遠參於前輩茲由是正晉典校讎豈但讀平

生未見之書抑以成賢人可久之業往服厥職以俟東
求

范鍾除國子祭酒誥

成俗化民必由乎學傳道授業當立之師然非博習修
潔之儒曷任教養作成之寄以爾稟資恬淡履行粹純
列職郎闈靖共爾位談經秘殿啓沃朕心擢由冊府之
中進陟儒宮之長成均以治學政精勤而誨諸生汝所
素明奚勞多訓

林畧除太府少卿誥

朕思治勵精任人共政思得吉士以重列卿以爾心地
坦夷性資寬厚學問得先賢之旨趣詞章為後進之宗
師中外荐更聲稱藹著粵自祠庭之佚屢興宣室之思
資爾名儒貳予外府豈但攷受藏之數蓋將為進用之
階尚克欽承以永終譽

顏頤仲除太府少卿誥

京兆素號難治非明敏長材恢恢游刃者曷勝其任克

稱厥職可後褒遷以爾通練而勤寬猛相濟明於聽訟
枉直立分惠以恤民絲毫無擾冠攘相弭閭里相安予
嘉乃勲擢寘月卿之列渙汗其號以為天府之光益著
休聲嗣膺異渥

陳康照除司封郎中誥

貪位慕祿相率成風其來非一日矣朕勵精思治崇獎
恬退寘之班列將以新舊染而激末俗以爾學富詞麗
隸莠交輝宰邑佐州公明廉介恥阿時好十載居閒衆

正路開屈守邊郡累召不至風節凜然晉陞郎省非為
爾禁式違其行以副朕側席待賢之意

起居郎丁伯桂除中書舍人誥

西掖演綸既云試可中宸出綍遂畀真除以穆師言式
昭隆眷具官某量吞雲夢秀挹湖山接物待人上不諂
下不瀆修身端行簡而廉直而溫居烏府則務激濁以
揚清立螭坳則屢直前而奏事晉兼詞掖責飾皇猷必
也正名庶示寵褒之意肆予命汝伴登侍從之班茂對

殊休以階大任

袁甫除中書舍人誥

渙汗其號方膺輔郡之除式邁其歸亟正掖垣之任復
青氈之舊物登紫橐之穹班具官某氣節剛方風規峻
整有是父有是子詞源學海之淵深難為弟難為兄卿
月朗星之輝映獨掇魁倫之選荐更麾節之華秉史筆
於螭坳代王言於鳳閣兼司銓綜僉謂清通暫均佚於
祠庭每興思於宣室趣還表著重掌絲綸蓋疇已試之

庸徑錫為真之命不但討論而潤色尚資獻納以論思
益茂遠猷以階大任

起居舍人吳泳除起居郎誥

記動記言各分所掌在右在左以次而遷雖姑徇於曩
章實寢階於大用以爾言傳伊洛秀挹岷峨伯仲並立
於要津議論一循於直道典銓守法端如繩墨之誠陳
視草演綸編之詩書而無愧久參法從行畀真除暫資
鴻漸之儀增重螭坳之左益宏遠業庸副深知

國子祭酒王與權除起居郎誥

君舉必書正資直筆位定以德當用真儒以爾稟性溫
恭提身端謹踐更久矣聲譽藹然自趨覲於楓宸姑假
塗於棘寺雖晉陟成均之長猶未昭簡眷之隆徑立左
坳俾陪法從既不違於咫尺當益罄於忠嘉茂對殊休
以稱朕意

應繇除著作郎誥

著庭清選也矧由小至大步武寢高儻匪名儒曷稱厥

職以爾學粹而精詞麗以則禮闈校藝卓冠羣英由璧
水而登蓬山陟郎曹而直翰苑休聲綽著遠業未涯茲
除特寄徑耳益加韜養以俟柬求

衛洙除著作郎誥

由祕郎而佐著庭蓋舊典也越次而升允為異渥以爾
學粹詞麗得雋儒科策足周行靖共正直由棘庭而躋
祕府步武寔清晉名論撰之司仍兼郎省乃顯用之階
也茂對殊休益宏遠業

袁甫除著作佐郎誥

蘭臺東觀專司論撰非兼才學識之三長曷膺是選以爾氣剛以直識敏而明得父兄經術之淵源為學校諸儒之領袖早居冊府休譽彌隆擢寘著庭師言允穆益宏遠業茂對殊休

余元虞除著作佐郎誥

著庭之選素號清華名公鉅卿多由此而進以爾舍選蜚英諷和通練踐更中外所居見稱擢寘蓬山師言允

穆復提史筆仍攝郎闈步武寢高式昭隆眷益宏遠業
茂對殊休

方大琮除祕書郎誥

蓬萊道山儲才之地也華塗要津皆繇此而進故於擢
用必選名流以爾禮闈前列久著懋庸策足周行安恬
有守為丞外府通練而勤晉秩書林以階顯用益加涵
養庸副予知

余元廙江萬里同除祕書郎誥

圖書祕府天下之清選也或遷或擢罔匪名流以爾元
庶心醇氣和年高德劭迭丞寺監一意靖共既茂著於
休聲宜晉登於冊府以爾萬里早升黌舍屢冠文闈校
讎道山敷陳讜論欲養成於遠器姑序進於典書茂對
寵榮以需東掖

衛洙除祕書郎誥

圖書之府星應東壁地號西崑居其間者率以登瀛目
之苟匪名流曷稱茲選以爾擢秀名家蜚聲儒級踐更

滋久所居見稱策足周行晉丞理寺惟明克允不激不
隨擢真蓬山師言允穆益宏遠業以俟東求

王埜除軍器監誥

毋以日月為功實試賢能為上此用人良法也以爾學
問詞章世濟其美施之政事綽綽有餘晉總除戎仍兼
導旨允為異擢益展壯猷

蔣峴除軍器監誥

除戎器以戒不虞國家急務也雖分職以任其責而置

監立長實總其凡焉苟匪通才曷稱茲選以爾學博詞麗節勁氣和校文如水鑑之明典選若權衡之審談經秘殿啟沃朕心至於器械之微亦底繕治之績善於其職就使長之母曰序遷實階殊擢

鄧若水除武學博士誥

學分左右教育則均凡分職於其間必擇人而後授以爾西蜀之英質直好義比司胄學咸稱糾錄之公茲實武庠俾任博通之職其新矩矱以迪生徒